

Balua jenge ja Paulo kwa Timoteo Kilongoi

Kitabu chenye cha 2 Timoteo kiandikigwa na ndundame Paulo ku napunji jwakwe jwakemigwa Timoteo. Kitabu chenye kiandikigwa papipi nu kupela kwake patama padunia pano. Kingobu chenye akiba mukipungo kukilambo chuku Loma (2 Timoteo 1:16). Paulo akiba kupalana nu kujoana muno na Timoteo mpaka Paulo ankema mwana gwakwe nnola (Akafilipi 2:22, 1 Timoteo 1:2, 1:18).

Jenje nga balua jimwe kati ja balua nchenche eyaandika Paulo kujenda ku mundu jumwe jumwe papala kuandika kukikuta cha bandu abunhwamini Kilisto. Balua yenge itatu nga, 1 Timoteo na Tito na Filemoni. Kingobu chenye chi kiandikigwa balua jenje 2 Timoteo, bandu abunhwamini Kilisto abakiba bakatawaligwa ni kingwana cha Loma batenda kupotekigwa muno. Pangaje chenye ngi kilebe chikintenda Paulo atabigwe, yene akiba akannagila Timoteo aimbalile kulaga. Andi pibi 1 Timoteo, Paulo nganhunda muno Timoteo ku nhwalo gwa akaboli buwangi (1 Timoteo 1:16-18). Uyo anenge Timoteo kutenda kiika kingobu chukulaga nnongi jito (Lipungu lya 3:1).

Agabi mokitabu

Paulo atumbu kukumpata abali Timoteo, kuboka penia annimbia mwojo (Lipungu lya

1:1-18).

Kabe ankwejali Timoteo aimbalile (Lipungu lya 2:1-13).

Kuboka penia ampe malagilo ku nhwalo gu kutama kukunhwamini Yesu (Lipungu lya 2:14-26).

Kabe annenge ilebe eipakuika nnongi na pipaligwa kamula (Lipungu lya 3:1-4:8).

Paulo ajomole kukunnagila mwene Timoteo (Lipungu lya 4:9-24).

¹ Ne Napaulo nandundame ba Yesu Kilisto kukupala kwa Nnoongo. Mekigwe ndangache bwomi ogwatulagila Nnoongo mu kulondana na Kilisto Yesu, ² nunhwandaki mwe ma Timoteo mamanango manumpala muno,

Nunnyope kana Nnoongo Awabito na Yesu Kilisto Angwana bito bampe gwambone gwa Nnoongo na kia na tengela.

Lilumbo na malobe gu kumpe mwojo

³ Nannumba Nnoongo junammegelela ku mwojo chwapi andi apabatenda akananhota bango, nannumba kila apanankombokela mu kugongalela kwango kilo na mui. ⁴ Mbi kombakela manjochi ginu na mbi nachuna muno nammone, kupala ndwele kuala mwojo. ⁵ Mbi kombakela imani yinu ya kweli, imani eibakweti awibinu Loisi nu uyo eibakweti amabinu Eunike. Manyi kutenda namwe uyo nkwati imani jenie. ⁶ Magambu gwa genia nankombokela nkolokeye kitoi champi Nnoongo mangobu panammekela maboko gango. ⁷ Kwa magambu Nnoongo

atupi Uhuke jwa Chwapi jukutubeka tube tak-abwogaje, nambu Uhuke jukutupe makakala na mapalano na mwojo kukikitawala.

⁸ Yene makalola onije kachalakicha Angwana bito, kabe makalola onije magambu gango nenga nandabigwe mukipungo kwa magambu ga benia. Nambu mikilonde nane mukulaga kwa magambu gu Nhwalo Gwambone, andi Nnoongo pampe makakala. ⁹ Nnoongo atukolite, atukemite tube bandu bakwe mwene, ngiti gambu ga itendwa yito yamboneje, nambu andi papaile Nnoongo na gwambone gwakwe. Ngatupe gwambone gwenio kwa magambu ga Yesu Kilisto tango dunia kupanganigwaje, ¹⁰ Nambu ibekigwe kipola kwinu ngoe kukuika kwakwe Nkomboi jwito, Yesu Kilisto. Jwenio aboite mbyu makakala ga kiu nu ku ndela ju Nhwalo Gwambone ngauhekula ndaa bwomi gwanga kiu.

¹¹ Nnoongo ambambwile ne mbe nandundame na naboli kwa magambu gu kutangacha Nhwalo Gwambone, ¹² genia nga agameka ne mbotakigwe ngoe. Nambu ne mbi kupweleje magambu nummanyi kipola jununhwamini, kabe manyi kutenda jwenio makilendela chambile, mpaka lichoba lyapakubuja. ¹³ Nkamula gwicho maboulo ga kweli ganammolite andi kilenganakio kwinu. Na nnyendekeye mu imani na mapalano agankweti mukulondana na Yesu Kilisto. ¹⁴ Kwa makakala gu Uhuke jwa Chwapi jwatama nkati jito mikigoye gwicho kile chache chambone chankamuigwe.

¹⁵ Andi pummanyi, bandu boa bi kilambo chuku Asia banekite, kati jabe abi Fugelo na Helimogene. ¹⁶ Najopa Angwana babonelange kia akalongo ba Onesifolo, kwa magambu akan-imbua mwojo pajingi. Na aloije oni kutenda nakiba kukipungo, ¹⁷ nambu kingobutu apaika kukilambo chuku Loma, ngatumbu kumbala-pala kukachana mpaka ngambata. ¹⁸ Najopa Angwana bankole kia Nnoongo lichoba lya-pakuhukumu bandu! Namwe mmanyi gwicho majingi agandendile okwo ku Efeso.

2

Mpakachi juna kuaminika jwa Kilisto Yesu

¹ Mwe mamanango Timoteo, mma na makakala mwagwambone gutupatite mu kulondana na Yesu Kilisto. ² Na maboulo agunyoina nakabola nnongi ja akachaili ajingi, ugo mabolange bandu abaaminika na benia baoto kabola bandu bange.

³ Na mwe mikilonde mukupotekigwa andi lityala lina kuaminika lya Kilisto Yesu. ⁴ Lityala elibi kungondo kupaligwaje kamu maengo gangabe gumungondo, kupala aotole kunhwalalila nkolongwa jwa matyala. ⁵ Uyo mundu jwapetana mukubutuka mbelo kupataje upo panga agabala malagilo gukubutuka agabekigwe. ⁶ Nnemi jwakamwi liengo kukachana nga ojwapaligwa kupata lipungu likutumbula lya mauno. ⁷ Magabekange umwojo genia gannongela na Angwana mabanhwotoya kimanya ilebe yoa.

⁸ Mankombakela Yesu Kilisto ojwayoigwa, jwakiba ju lungolo lwa Daudi, andi pulenga Nhwalo Gwambone gundangacha. ⁹ Magambu gakwe ne mbotekigwa na ndabigwe mitondolo andi nabaja, nambu lilobe lya Nnoongo litabigweje mitondolo, ¹⁰ ku yene nhimbilila kila kilebe kwa magambu ga bandu ba Nnoongo, kupala angweto uyo bapatange ukoli ogupatikana kwa ndela ja Kilisto Yesu, gwenio uleta kibumo cha Nnoongo machoba goa pangapela. ¹¹ Kilonge chenje nga chakweli,

“Anda ngutuwe pamwe nakwe,
matulama pamwe nakwe.

¹² Anda tujendakie kuimbalila,
matutawala pamwe nakwe.

Andatunkanite,
jwenio uyo matukana.

¹³ Anda tubi kuaminikaje,
jwenio majendekea kuaminika machoba goa,
magambu jwenio kikikanaje mwene.”

Nkamwa maengo jwajeketeligwe na Nnoongo

¹⁴ Makombakeye bandu binu minhalo jenje na kakelebuya nnongi ja Nnoongo bakotoke mitau kwa malobe. Mitau jenie kualaje, gambu jaalabiya abajoa. ¹⁵ Nkachana kamwa ilebe enhwalali Nnoongo mme makamwa maengo mambone makalola onije ku liengo lyakwe na jwombe abola telatela nhwalo gwenio gwa kweli. ¹⁶ Mme kutali ni minhalo jikipuuchi janganhwalali Nnoongo gambu genia gajendeke kabeka bandu kutali na Nnoongo. ¹⁷ Maboulo andi genia nga andi libanga lyangalama elilye

mmele. Kati ja akaboli benia nga Humeneyo na Fileto. ¹⁸ Benia bijilekangite kutali ndela ja kweli ni bijialabia imani ja bandu bange kuku-longe kwabe kulenga kuyoigwa kwa bandu boa kupetite. ¹⁹ Nambu kweli ja Nnoongo jibi ndii andi libwe panani jakwe paandikigwe malobe ganga, “Angwana bamanyi baba ababi bakwe,” na “Kila jwalenga jwenio nga jwa Angwana, nga mpaka alekane na mabaja.”

²⁰ Mu nyumba ngolongwa mubi ni mitungati na yombo ya kila aina, yenge itenganichigwe ku uloi na jaabu gambu gwa liengo lya nnyika na yenge itenganichigwe ni mikongo yenge nu utope gambu gwa liengo lya kila machoba. ²¹ Anda mundu akijegwiye nu kube kutali ni min-halo mibaja, aba kilebe chukamuli maengo gan-nyika magambu abekigwe kube jwa Angwana, baalali Angwana mundu jwenio abi tela kamu liengo lyambone. ²² Mma kutali na tama jukombo na ntama tela na papala Nnoongo na imani nu kupalana na tengela pamwe na bandu boa abajopa Angwana ku mwojo gwa chwapi. ²³ Ntama kutali ni mitau janga mana nu jukutokamala, mmene umanyi kutenda genia galeta bulwa. ²⁴ Mpakachi jwa Angwana akajo-manaje, apaligwa kube jwa nuu ku bandu boa, jwaotwi kubola na juna kuimbalila. ²⁵ Jwa nuu pabakelebuya bandu abankana, gambu benia Nnoongo aotwi kape kingobu chukulapa nu kuji-manyanya kweli. ²⁶ Penia malango gabe magabujila kabele, mabapokonyoka muntambo gu Lichetani ogubajonjite na kabeka bannyali.

3

Machoba gukupela

¹ Nkombokela kutenda, mu machoba gu kupela kupakube na mangobu gu kulaga. ² Bandu bapakikipala bene, bina kupala uloi na bina kukilumbalila na bina lunjonjo na bina kuntukana Nnoongo na bangajoa achik-ibelei babe, banga lumba na bangang'ongale Nnoongo. ³ Bandu banga mapalano na banga pala kuchikachana bina kung'ing'ia bina nnomo na akakale, mabachimwa kila chikibi chambone, ⁴ bapakagaluka akajabe banga jali na abatweli lunjonjo, bipala kikikonja muno nu kotoka kumpala Nnoongo. ⁵ Kwa kunja bibonekana andi bandu bina kunng'ongale Nnoongo, nambu bagakana makakala gakwe. Mikijepange muno na bandu andi benia. ⁶ Bange bandu kujenda mu nyumba ya bandu na kagaluya akikege abapunganikwe abalemile ni miigo ja mabaja na abalongaleigwa na tama mbaja ya kila kilebe, ⁷ akikege benia bajiganga kukibola kila machoba nambu ngu kujimanyaje kweli. ⁸ Bandu benia bijikana kweli andi Yane na Yambule apankana Musa. Bandu bamba baobite mumalango gabe bachipwile muimani. ⁹ Nambu biotwaje kujendeke muno magambu kutokamala kwabe makubonekana kipola ku bandu boa, ngapikiba ku Yene na Yambule.

Undo yukujomolela

¹⁰ Nambu mwenga ma Timoteo, magakengime maboulo gango na majendo gango na gambala

mu kutama kwango na imani jango na kuimbalila kwango na mapalano gango na kulende kwango, ¹¹ nu kulaga kwango nu kupotekigwa kwango. Kabe magamanyi agambatite okwo ku Antiokia nu Kuikonio nu Kulusta. Ngaimbalila kupotekigwa kukolongwa muno! Nambu Angwana ngabangola mu genia goa. ¹² Kila mundu jwapala kutama kukunhwalali Nnoongo mu kulondana na Yesu Kilisto apa kupotekigwe. ¹³ Bandu akabaja na akakoboi bapakube akabaja muno, bakakoloya bange na beni angweto bikoloigwa. ¹⁴ Nambu mwe ntama mu kweli ujaje ejimmoligwe ngumujeketela muno. Mamanyi abakiba akaboli binu, ¹⁵ mmi kombakela kutenda tango ungota gwinu mmanyi Majandiko Gachwapi genia gaotwile kumpe malango agaleta ukoligwa ku ndela ja imani ku Kilisto Yesu. ¹⁶ Majandiko Gachwapi goa gabi nu uhuke gwa Nnoongo gaotwi kajangata kubola kweli nu kelebuya nu kugalambuya mabaja gabe gambone na kalongolea bandu batame andi papala Nnoongo, ¹⁷ kupala mundu jwammegelela Nnoongo abe na kila kilebe chikipaligwa muliengo lyakwe na abe tayali kamu maengo goa agabi gambone.

4

¹ Nnongi ja Nnoongo na nnongi ja Kilisto Yesu jwapakahukumu bandu ababi bwomi na abawile na kwa magambu atenda kuika kutawala kongo abi Nngwana nannagila, ² ntangacha lilobe lya Nnoongo, mpanganike kutangacha kingobu chambone andaje kingobu changa mbone na

nkaliye nkelebuye na mape bandu mwojo mak-abola kukuimbalila kwoa. ³ Gambu makiika kingobu penia bandu bipenikije maboulo ga kweli, nambu bikengama tama yabe bene ni kikikongole akaboli nduu abapakalengela ilebe yae yibipala kijoa. ⁴ Bikananga kujoa kweli, bigalambukila omo yu uwangi. ⁵ Mwenga, nambu mma mio kila ali, nhwimbalila kupotekigwa na ntenda liengo lya ntangachi jwa Nhwalo Gwambone na nnenganakia kwambone upakachi gwinu ku Nnoongo.

⁶ Kingobu chango chu kuwe kibandakile na myai jango jimiminigwa andi yene akakung'i pabamimina lilumbo lya divai nnongi ja Nnoongo. ⁷ Mbutine ngondo kwambone, mwanja gwango nyomwile, imani ng'oite gwicho. ⁸ Ngoe iigi kupata hupo yambaligwa gambu gukunhwalali Nnoongo hupo ejibi Angwana, ojwahukumu pipaligwa ku lichoba lyenie ngiti netuje na baba abalende kwa chuna kubuja kwabe.

Malagilo ga mwene Timoteo kuboka kwa Paulo

⁹ Makachelwaje kuika kwangone. ¹⁰ Gambu Dema aipai ile ya padunia pano nganeka nu kujenda Kusesalonike. Kelesike ajei ku Galatia na Tito ajei Kudalimatia. ¹¹ Luka tu nga ojwabi pamba pamwe na nenga. Mantole Maluko nhwika nakwe, kwa magambu maotola kunyangata mu liengo lyango. ¹² Nakankinga Tukiko kukilambo chuku Efeso. ¹³ Pampakuika umbotalele likoti lyango linililekite kwa Kalipo

kukilambo cha Kutoloa, uyo unetele ni itabu muno yae itendakigwe kulimbendela.

¹⁴ Pundi kipala jwakemigwa Alekizanda andendi mabaja majingi, Angwana mabannepa kubo ke mu itendwa yakwe. ¹⁵ Namwe mma maha najwenio kwa magambu akate kana muno nhwalo gwito.

¹⁶ Pinikikola pu kutumbula akibaje mundu jwajemite kingono chango, boa ngabaneka. Nnoongo balekeke malemwa gabe! ¹⁷ Nambu Angwana ngabatama pamwe nane, ngabambe makakala, mpaka nganhotola kuutangacha nhwalo gwoa, kupala bandu banga Akayahudi bujoe, kabe ngakomboligwa mu hukumu ja kiu andi mukano ji liimba. ¹⁸ Angwana mabangombola na mabaja goa nu kundola tegatega mpaka ku kingwana chabe chu kumbengu. Kwabe kube ni kibumo cha Nnoongo machoba goa pangapela! Unhyo.

Kapata abali kukujomolela

¹⁹ Mapatange abali Pilisika na Akula, pamwe bandu ababi kunyumba ja Onesifolo. ²⁰ Elasto ngaigala ku Kolinto na Tolofimo ngananneka Mileto kwa magambu akiba ntamwe.

²¹ Nhwika chokwe tango nu kuikaje kipepwe. Ebulo na Pude na Lino na Kelaudio bampatanga abali uyo na akalongo bange abunhwamini Kilsto.

²² Angwana babe namwe umwojo gwinu. Nanyopelanga mmoa upeelee gwa Nnoogo.

Ngindo New Testament 2015
The New Testament in the Ngindo language of
Tanzania, 2015

copyright © 2015 The Word for the World

Language: Ngindo

Translation by: The Word for the World

Contributor: The Word For The World

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-02-06

PDF generated using Haiola and XeLaTeX on 11 Nov 2022 from source files dated 29 Jan 2022

d5116cc2-3c1c-51ad-b1b2-7dde35a6f8cb